



's Wedde.

's Wedde, deß hoddß uff sich,
Deß loßd mr liewer seiⁿ,
Dann unner fuffdesuffzig
Fallschd hunnerdmol ereiⁿ;
Die Hooge, die Finesse,
Die Schbrich, die Schlich, so gladd —
Un dhuschd nor ähns vergesse
Dann bischde an de Ladd.

Vedschd hammer aah im „Bäre“
Bun Odderberg geschbroch,
Un ähner mähnd dann: „'s wäre
Drei Schdunn se laafe doch.“
„Waß, freischd de Phillb, wie schbassig,
Waß hallen ehr degeh?
Ich wedd, drei Dahler daß ich
In 're halb Schdunn niwergeh.“

Ich dhu jo Krakau kenne,
Grad wie meiⁿ Hoffesack
Un hanns emol mit Kenne
Nah in zwää Schdunn gepackt;
Drum sa' ich aah ganz sicher:
„Es geld, ich hall die Wedd!
Jezd zeigt sichs jo, Herr Fischer.
Wer wohr vun uns geredd.“

Der rufd noch nohme Bolle,
Un drinkd gemiedlich aⁿ
„Wann Sie noh Krakau wolle,
Iß heegschde Eisebahⁿ.“
„Wieso“, er lachd wie närrisch,
„Jezt isseß gradaus zwää,
Un punkt halb drei, do werr ich
Wie gewedd, noh Krakau geh.“

Naⁿ, 's neegschde Mol do hann ich
Devor mich rewaⁿschird;
Es war im „Blooe Sawichd“,
Do werdd de Phillb lachird.
„Die beschd Flasch Weiⁿ im Keller
Zahl ich!“ — „Waß Du net sa'schd!“

„Wann do denn Aeschedeller
Uff ääh Sieb z'sammeschlaschd.“

„Wann's sunschd nix isß“, mähnd drucke,
De Phillb un hodd gepfiff,
Un ohne lang se mucke,
Hold er seiⁿ Herrschhorngriff;
E Schlagg, in hunnerd Schdicker
Reihd's Bläddche unnerm Disch
Un schdolz ruft er: „Maⁿ Dicker,
Schdell nor die Flasch als frisch!“

„Do mach dr nor käⁿ Quale,
Der Weiⁿ der schdehd schun do,
Doch Du muschden bezahle,
Brauschschd gar net lang se fro'.“
„Ich? Godd soll mich verdamme!
Warum?“ „Ich will ders sa'!
Du sollschd deß Ding jo z'samme,
Nedd ausenannerschla'“.

